

illi Scriptores posteriores et coævi, qui Illyrios vel in toto vel in aliqua parte commixtos tenent, ex quibus ea sunt depromenda, quæ si Illyrico competant, vel eidem adempta sint sibi que attributa, suæ per antiquæ genti et gloriæ jure reddenda.

Nihil profecto dulcius jucundiusque docto ac honesto viro dari potest, quam hos Scriptores sedulo evolvere, monumenta examinare, cuncta minutim observare, et quæ crassis latent occultata tenebris, et circumdata fabulis, et vilibus involuta præjudiciis, auxilio critices apprime enucleare, inexpectata deferre, singula indicare quibus annis a mundi creatione, quibus olympicis, quibus ante æram vulgarem, quibus post hanc æram, et quo in loco aut regione quælibet evenerint; denique nihil in lucem ponere sine gravi auctoritate, teste, ratione aut saltem probabilis conjectura; atque omnia claritate et sermonis nitore illustrare, ac Illyriis contemplanda exhibere.

Quamvis a primordiis Illyrici triginta duobus sæculis distemus, tamen summam capiemus voluptatem cum legerimus eorum Regum et Ducum præclara gesta referri; eosdem prudentia et publica fide plurimum valuisse; sermonem institui de eorum legibus, consuetudinibus, de potentia tam terrestri quam maritima, de fœderibus initis, de bellis strenue actis, de victoriis relatis, de suppetiis